



TUŽITI tužitelje i SUDITI sudijama

U moru zahtjeva plenuma, civilnog društva, nevladinih i sličnih organizacija za smjene, ostavke, utvrđivanje odgovornosti ovog i onog za ovo i ono, nisam primijetila (a možda mi je i promaklo) da je neko ozbiljan ozbiljno zatražio da se malo preispita rad tužilaštava i sudova na svim nivoima.

Jasno mi je što političari bježe od javnog prozivanja sudaca i tužitelja, koji su jelte nezavisni i ne preporučuje se političarima miješati u njihov posao.

Jasno mi je i što šuti ekipa iz međunarodne zajednice, oni su nam reformirali pravosuđe na način da bi svaki od kreatora pravosudnih reformi u BiH u vlastitoj zemlji sigurno završio pred sudom odgovarajući za veleizdaju ili neki sličan protustavni akt da je predložio takvu reformu pravosudnog sistema u svojoj matičnoj državi. Shvatili da su pogriješili, ali neće da priznaju. Može im se... Nisu mi jasni plenumi, demonstranti, mediji... Zašto uz političare (čija je odgovornost u manjoj ili većoj mjeri za stanje privrede, privatizacijske pljačke, katastrofalan ambijent za poslovanje itd. neupitna) niko ne postavlja pitanje: Šta su posljednjih 15-20 godina radili pravosudni organi države, tužilaštva i sudovi? Na svim nivoima...

Ako je tačno ono što kaže federalni premijer (a ne vjerujem da bi se poigravao sa ovim, lako provjerljivim podacima) da je u proteklih 10 godina podneseno 1.500 krivičnih prijava protiv 2.000 osoba za krivična djela različitih zloupotreba položaja, privrednog kriminala, organiziranog kriminala, sa sumnjama da su FBiH, kantoni i brojne fizičke osobe oštećeni za više milijardi KM.

Rezultat: sudski epilog imalo je desetak prijava, a osuđujućih presuda bilo je četiri ili pet. U proteklih pet godina u FBiH nije procesuiran niti jedan slučaj zloupotreba u privatizaciji, a u protekle tri godine procesuirano je svega pet slučajeva zloupotrebe položaja, protivzakonitog posredovanja ili nekog drugog korupcijskog krivičnog djela.

Može li nakon ovakvih podataka iko normalan reći da tužilaštva i sudovi u Federaciji BiH (a ništa bolja situacija nije ni u RS) rade svoj posao??? Hoće li se konačno *Visoko sudsko i tužilačko vijeće* ili kako se već zove to nešto što bi trebalo kontrolirati rad tužitelja i sudova, početi miješati u svoj posao, ako već političari ne smiju, međunarodna zajednica neće, a plenumi, NGO i civilni sektor ne umiju???

Kada će početi sankcionirati tužitelje koji predmete drže u ladicama (na stolovima, u ormarima, podrumima) dok ne zastare ili tužitelje koji potroše gomile budžetskih novaca dokazujući nedokazivo (sjetimo se slučajeva Bičakčić, Čović etc.), sudije zbog čijih neukih presuda ova država mora plaćati milionske odštete kriminalcima i zločincima, sudske vještake koji Sudu umjesto dokaza poturaju argumente tipa "ja sam ugledni profesor na fakultetu, a advokati me ovo pitaju"???

Jer, u raspodjeli krivice za kaos i beznađe u kojem živimo, sudije, tužitelji i društvo iz svijeta pravosuđa stoje rame uz rame sa političarima. U prvim redovima... **B**

Aida Delić,
glavna i odgovorna urednica